


四川名勝志

廿五

邛州

十册止



漢	書	門	類
二	三	六	
九	三	八	
冊	架	函	號

內	閣	文	庫
漢	書	類	
二	三	六	
九	三	八	
冊	架	函	號

內閣文庫	
番號	漢 2368
冊數	93 (85)
函號	291 35

明名勝志八十五



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak








四川名勝志卷之二十五


閩中曹學佺能始著

上川南道屬

邛州 直隸布政司在省城南三百里 領縣二



漢書張騫自河源歸來得高節竹植于邛山故名邛來郡國志云邛來山自沈黎直走千里至臨邛環抱為鎮山圖經云山曰邛來浸曰邛水民曰邛民毛曰邛竹矣○水經注云江水又逕臨邛縣王莽之監邛也莽改成都為導江太守為卒正時公孫述為導江卒正治臨邛志云廢公孫述城在州



南十里○華陽國志張儀城臨邛周廻六里高五丈其制與成都郫同○卓王孫宅在州南五里基方十里耕者往往得銅錢按史記卓氏之先趙人秦破趙遷卓氏夫妻推輦而出曰吾聞岷山之下沃野下有蹲鴟乃求遠遷致之臨邛華陽國志臨邛有古石山出石礦大如蒜子火燒合之成流支鐵甚剛因置鐵官有鐵祖廟漢文帝以銅鐵賜宦者鄧通通假民卓王孫歲取千匠故王孫貨累巨萬億鄧通錢亦盡天下寰宇記鐵山鑄錢卽此山也山出木蓮不異水之芬香○司馬相如成都人

素與臨邛令王吉善相如客舍都亭王吉日往朝卓王孫聞令有貴客爲具召之并召令酒酣令前奏琴曰竊聞長卿好之願以自娛相如爲鼓一再行是時卓王孫有女文君新寡好音故相如以琴心挑之相如時從車騎甚都文君竊從戶窺心悅而好之相如乃令侍人重賜文君侍者通殷勤文君夜奔相如與俱之成都○采蘭雜志載文君閨中一井文君手汲則甘香沐浴則滑澤鮮好他人汲之與常井同本志云白鶴驛有文君井水作酒味釋無可送李少府之臨邛邛南才作尉調補一

何早發論惟公幹承家乃帝枝山長風裊棧江陰
石和漸舊井王孫宅還尋獨有期陸務觀詩落魄
西州泥酒杯酒酣幾度上琴臺青鞋自笑無拘束
又向文君井上來○水經注曰江水又與文井江
會李冰所導也江上有長堤堤跨四十里有朱亭
亭南有青城山山上有嘉穀山下有蹲鴟卽芋也
所謂下有蹲鴟至老不饑卓氏之所以樂遠徙也
○文井江至蜀郡臨邛與布濮水合華陽國志云
布濮水自布濮來合火井江有火井夜時光映上
昭民欲其火先以家火投之頃許如雷聲火焰出

通耀數十里以竹筒盛其光藏之可拽行終日不
滅井有二水取井火煮之一斛水得五斛鹽家火
煮之無幾也博物志云臨邛火井諸葛丞相往視
之後火轉盛蜀都賦云火井沈熒于幽泉隋置火
井縣于此舊史云袁天罡爲火井令殘碑尚存有
斷其龜趺以作盆盎者立斃圖經云天罡嘗登山
相縣治因謂之相臺山文同寄太博孫公游火井
詩七盤磴道與雲浮下見高林壓縣樓元時始省
入今州南二十五里火井堪巡簡司是○鶴山在
州城西八里常璩志云臨邛名山曰四明日群羊

按卽今白鶴也漢胡安導師于山中乘白鶴仙去弟子卽其處爲白鶴臺魏華父營造記曰州西直治城十里所有山曰白鶴林麓蒼翠江流縈紆蔚爲是州之望隋唐迄今庵院凡十四所遠有胡安先生授易之洞近有常公諫議讀書之庵泉有滴珠樹有木蓮白鶴有臺玉兔有踪中峯信美平雲之觀西巖翠屏萬竹之境皆山中勝處壁間繪像率范瓊杜措丘文播諸人名筆雖丹青剝落而筆法具在本山志云前輩丹青則有任子逸范瓊與夫文同湖州之遺筆文人詞翰則有鄭少微張公

庠與夫張商英王賞趙雍之舊題至于靈鵲去而臺空玉兔潛而石化是山之有可紀書如此宜其歛西州之勝而爲臨邛無窮之觀也有信美亭翠平閣俱在山頂勾龍遊實信美亭詩擲罌渡水過西頭東面一亭無限幽陸務觀翠平閣詩把酒孤亭半日留西巖獨擅鶴山秋□益部耆舊傳胡安臨邛人聚徒于白鶴山司馬相如從之受經此縣又有林間善博學自古天子有輶車之使惟間與嚴君平知之爲揚雄所師○志云州西十里盤陀山有石刻佛像唐人鑄吳師二字其上又有郭汾

陽師四字五代及宋人皆有書墨○又七十里萬
松亭魏太和中建于山絕頂今僅遺址文同詩云
四野豁嘉亭松門夜不扃水邊來半偈月下了殘
經又三十里石盤戍俗呼爲望軍頂昔諸葛武侯
駐軍于此○碑目云臨邛令封君遺愛碑陳子昂
撰大唐邛州臨邛縣花置山寺新造無量壽佛石
龕像記朝議郎前侍御史馬宇撰元祐丁卯十二
月八日邛州天慶觀希夷先生詩刻文同跋元豐
中元日書

蒲江縣

在州城西
一百里

漢宣帝地節中穿蒲江鹽井兼置鐵官西魏始置
縣曰蒲江以治枕蒲水也縣南八十步蒲泉方丈
許冬燠夏涼四時不涸蒲草生焉謂之蒲頓有亭
覆其上曰蒲亭○方輿勝覽云浴丹池在蒲江縣
之崇真觀世傳軒轅修煉于此鶴山集云嘉泰中
堂有羣鶴西來翔舞于紫極殿之前檻今治內紫
極觀是○七籤云主簿化群仙翔集之所化言治也
主簿山治在邛州蒲江縣界郡主簿王興于此學
道得仙一名長秋山南有石室玉堂松柏生其前
本志云長秋山有卧牛井昔女冠楊正見修煉于

此得石卧牛于下砌井而泉湧出今井碑尚存寰
宇記又謂之小可慕山言登此山景慕仙風非小
可也○紀勝云縣南十五里莫佛鎮相傳漢文帝
時有莫將軍征西南夷歸而學佛于此其佛臺前
石羊虎尚在居民往往于其處得金銀杜光廷莫
公臺詩奇絕魏臺時濁流古來人號小瀛洲路通
霄漢雲迷晚洞隱魚龍月浸秋舉首摘星河有浪
自天圖畫筆無鈎將軍悟却希夷訣贏得清名萬
古留

大邑縣

在州城北
二十里

寰宇記云大邑縣唐咸亨三年分益州晉原縣置
在鶴鳴山東以壤土廣大爲名○道書云鶴鳴山
二十四化之第三化也應氏宿山有二十四洞應
二十四氣洞口約闊三尺深不可測每遇一氣則
一洞竅開餘皆不見有七十二穴應七十二候東
西二溪出其兩腋太清宮建在頂喙玄真坊建在
項大坪是其背延祥觀在天柱山石柱腰巖是其
兩翼冠子山三峯中峯是其尾乃馬成子張道陵
昇仙之處杜天師鶴鳴山詩五氣雲龍下太清三
天真客已功成人間回首山川小天上凌雲劒佩

輕花擁石壇何寂寞草平轍迹自分明鹿裘高士
如相遇不待巖前鶴有聲文同題鶴鳴化上清宮
秘宇壓孱顏飛梯上屈盤清流抱山合喬樹夾雲
寒地古芝英折巖秋石乳乾飈輪遊底處空自立
層壇○縣東北十五里青霞峯峯下有碧玉潭劍
南詩藁云青霞嶂碧玉潭皆山水佳處詩云千巖
角逐互吞吐一峯拔起矜崔嵬日光微漏見潭底
水氣上薄雲成堆志云此山常孕雲霧又名霧中
山峯頂有金剛足跡曰金剛臺張俞詩霧山環合
自雲川戶有清溪種玉田萬木桃花不知處幾人

曾得問秦年碑目云鶴鳴山拄腰巖有李陽冰篆
龜鶴齊年及陳搏草書福壽大字○勝覽云平雲
亭在大邑之靜惠山蓋文忠范公鎮所居公熙寧
間上疏論新法致仕既還蜀窮山水勝處徜徉此
山有詩云磴道雖云險肩輿亦可行坐來知日永
立處與雲平按靜惠山一名東山山上土城相傳
是蜀漢將軍趙雲築蓋雲嘗防羗于此有雲墓及
廟存○通志云鳳凰山在大邑西八十里山有虎
劈泉唐契覺道人結庵于此有虎爲之劈地出泉
有柏十圍根盤巨石之上如騎鯨然曰騎鯨柏文

同邛州鳳凰山新禪院記云臨邛郡西北皆大山所叢衍迤磅礴深蟠遠走直注大渡限迤蠻譎鬱如雲烟涌如波濤晴光陰嵐明昧一矚其間孤峯峗然傑立豪峙首領巖巘腹背峯阜翼開長巒尾掉高岡繁林茂樹綠蔭纈荼圍擁森合粹若毛羽地志書之曰鳳凰山者蓋前人嘗以狀而名之爾唐有契覺道人艾草鑿址構菴此地日禮華嚴秘典以作佛事嘗汲泉澗下頗念其遠有虎爲之劈地出水澄潔甘凜悉異他所發源甚盛于今賴之矣

雅州

直隸布政司在省城南四百五十里領縣三

史記秦始皇二十五年滅楚徙嚴王之族以實此地故曰嚴道漢爲縣屬蜀郡文帝徙淮南王之族于此揚州修蜀志補遺引蜀本紀以爲許由之友嚴僖所隱地也○漢高六年分置青衣縣水經青衣水出青衣縣西蒙山東與沫水合注云縣故有青衣羗國竹書紀年梁惠成王十年瑕陽人自秦道嶧山青衣水來歸漢武帝天漢四年分沈黎郡置西部都尉主青衣公孫述之有蜀也青衣不服世祖嘉之建武十九年以爲郡安帝延光元年置

蜀郡屬國都尉青衣王子心慕漢制上求內附順
帝陽嘉二年改曰漢嘉得此良臣也本志又有邛
穀王任君貴越蜀人新莽之亂奮集英雄起越嶲
殺莽所立太守枚根而自立保全一方見西南夷
傳按州城隅有任使君廟矣○晉末李雄竊據夷
獠雜居西魏僑立蒙山縣後置雅州郡國志云漢
源縣有離堆蜀守李冰所鑿離卽古雅字也州以
此名○州治舊在雅安山上宋大中祥符間國子
博士何昌言爲守以地多嵐障徙于山麓山形如
月象心字州治左點所治右點文廟居中故又名

月心山○州署有雙鳳堂宋至和中蘇老泉携其
子軾轍謁雅安太守雷簡夫雷以書薦于張文定
公及韓魏公歐陽公遂成大名後守構堂以侈其
事○黃魯直木蘭歌帖梁甫吟帖俱在州治○學
南長濱江側有濯纓無絃二亭俱文同爲隱士王
潛書○禹貢蔡蒙旅平和夷底績葉少蘊解蔡在
嚴道蒙在漢嘉嘉卽嚴道也旅平者禹治水成功
旅祭于此俗又呼爲落平山也舊傳諸葛亮于此
夢見周公因立文憲王廟遂號周公山按文憲王
廟記軍事推官王育撰叅軍李夢徵書山半有石

筍移之卽雨又有龍穴常多陰雲李燾遊蔡山序
蜀惟岷山蔡蒙二山雅獨兼有之焉○寰宇記云
和川路在縣界西去吐蕃大渡河五日程從大渡
河西郭至吐蕃松城四日程羗蠻混雜連山接野
鳥路沿空不知里數卽禹貢所謂和夷底績也本
志東北有和夷壩是○大唐新語云陸象先爲益
州長史奏嘉邛路遠請鑿岷山之南以從捷近發
卒從役居人不堪道亡瘡死無筭左拾遺張宣明
監姚雋諸軍事兼招慰使親驗艱險移牒益州曰
此路高山臨雲深谷無景至有斗絕巨險不通人

蹤經之者必搏壁傍巖脅息而度雖竟日登頓二
十里許本人猶堪淚下鐵馬亦可蹄穿象先覽之
兢惕遽罷役仍舊路以聞蜀人賴焉○孫漸昭應
廟記云其山蔡蒙其關邛崃水經注曰岷山東北
百四十里曰崃山中江所出東注于大江崃山邛
崃山也在漢嘉嚴道縣一日新道又東百五十里
曰崃山北江所出東注于大江故郭景純江賦曰
流二江于崃崃也○圖經云嚴道山在州南五里
本名鹿角山唐天寶六年敕改爲嚴道山山下有
丙穴出嘉魚方輿云萬勝岡在州西有龍觀寺其

趾曰百丈山自邛崃或起或伏環遶州治諸葛武侯擒孟獲旋師至此岡下人聚觀之因名後建亭于上爲龍觀亭○碑目云高孝廉墓碑在嚴道縣東二十里按其碑年月乃漢建安十四年立高君兄弟皆孝廉有二大闕其一曰故益州太守武陰令上計吏舉孝廉諸部從事高順字貫方其一曰漢故益州太守陰平都尉武陽令北府丞舉孝廉高君實字貫光又一大碑其首云故益州太守高君之碑木志云漢孝廉高君墓在金鷄山下孝廉橋墓跡蕪沒僅有二石坊在田中坊亦以大石堆

塚而成非石柱也其一方隸云漢故益州太守陰平都尉武陽令北府丞舉孝廉高君仍有數字剝落○方輿云金鷄山在嚴道北三十五里俗傳有金鷄鳴于此循金鷄山而上二百步有石室中有石像爲爾朱真人宋嘉泰中碑尚存□碑目云羊竇道碑在嚴道縣東三十里金雞山下漢永初六年碑也○梁益記云大小漏天在雅州西北山谷高深沈晦多雨而黎州常多風故謂黎風雅雨宇文溥新路賦惟天下之至險有嚴道之漏閣馬孤峯上絕于青天湍波下走于長川斷崖橫壁立之

岸飛溜濺千尺之泉洪适隸釋云蜀郡太守何君閣道碑光武中元二年刻此碑蜀中近出東漢八分斯爲之首字法方勁古意有餘如冠章甫而衣縫掖使人起敬不暇雖敗筆成冢未易窺其藩籬也○碑目云平羗江繩橋碑在嚴道縣平羗橋有唐咸通十年上官朴所撰碑字亦隸體今在江瀆廟江源出西徼遶西北郭謂武侯平羗夷于此沫水自廬山發源注于平羗江與沈黎之陽山江合流○志云州西北一里曰清源橋東北十里龍門橋三十五里道遠填橋五十里魚喜河橋州西七

里曰銅頭河橋近多功路曰大繩橋以上皆索橋也凡橋每歲仲春于兩岸各樹兩梲長二丈有奇梲上橫穿二柁上布竹繩巨兩岸繩之餘者屈垂向下輓轡絞束復橫以木梯布以篾笆周以欄索其高低闊狹視江爲度唐獨孤及索橋贊云維梁曰竿相引一索人掇其上如猱之縛轉帖入淵如鳶之落尋橦而上如魚之躍頃刻不戒霄無底壑卽此橋也○錄異記云唐王果謫雅州刺史經平羗江中望巖腹有鐵棺欲墜緣巖視其碑曰地裂山崩水漂我臨及長江危欲墜欲墜不墜遇王果

五百年後改葬我乃改葬之○志云州北百四十里山谷中湧泉深不可測一日三潮風浪如雷昔時白馬自泉出田野間雲擁之復沒名白馬泉又曰龍淵有宋紹興間祈雨碑猶存○竹溪在郡西三十里隱士胥九鼎所居陶仙洞在焉有林泉之勝魏了翁寄題胥園詩胥君頎然來錦囊背奚奴探囊發詩卷一一卿大夫未識胥園面詩卷自畫圖掃石卧竹影長鍾斲芋區胥君子此時林泉傲

金朱

名山縣

在州城東北四十里

禹貢蔡蒙旅平蔡屬雅州而蒙屬當縣矣九州記云蒙者沐也言雨露常蒙也山有五頂最高者名上清峯有甘露井水極清冽四時不涸相傳漢僧理真所鑿後日隱化井中圖經云蒙頂茶受陽氣全故芳香獨烈方輿記云虞允文嘗為名山監茶今清溪橋頭北廳猶在有梅及槐柳皆雍公手植壁間遺墨尚存○水經注曰縣有蒙山青衣所發東逕其縣與沫水會于靈關道寰宇云平羌水上源曰邛崃水又名平鄉水西北自嚴道縣流入自胥州洪雅縣界下又名青衣水本志云五頂山下

青衣河流遶縣前下田水口入嘉州○寰宇記云羅繩山在縣西五里從蒙山西流入廬山縣又北接邛州火井縣○鷄棟山在縣西南十七里地里志以蜀有鷄鳴山俗傳金鷄鳴天下太平也紀勝云鷄鳴山卽古之名山因爲名山戍縣名取此隋改自蒙山者○碑曰云名山治東里許有紫府飛霞洞開禧丁卯邑人苟沫于梓潼觀後麓一洞穴刻神之父母像併鑿石龍蟠其中請神作記親書于石今石龍書院是也○志云縣東北三十四里古土城周七十二丈乃武侯征蠻所築遺址見存

○大幕山在縣東四十里南接河羅戍北入邛州高七十里上聳天際靈恠錯雜之所○九州要記云百丈縣本嚴道縣地李膺記臨邛縣南百二十里至百丈卽其地圖經云有一穴口方圓百尺深如之山有九折坂夏則凝冰冬則毒寒漢王陽爲益州刺史行部至此興歎因之棄官唐武德元年置百丈鎮貞觀八年改鎮爲縣今之驛曰百丈里曰安賢本此○按百丈河在縣東北六十里卽置驛處河源自蓮花山來經驛東與邛水合流至新津入白馬河又名千尺潭近南五里銅鼓山爲漢

唐戍守之地○寰宇記云泉池山在百丈縣東四十里其山四面懸絕上有泉池因名○縣東南七十里佛鼻山左右有二目謂之天目元時于左目下建寺曰天目有大石甃小石甃之名

榮經縣

在州西南一百二十里

寰宇記云本嚴道縣地東西連接大山並無州縣巖巒阻絕不辨疆界唐武德二年始置縣因界內有榮經水口戍為名○志云榮水在城北一出相公嶺一出番境經水在城南一出瓦屋山一出改丁河一出汶川按相公嶺者以諸葛丞相征蠻所

經也攷丁河源出黑石汶川源出邛崃馬耳榮經水北流八擒孟渡即孔明七擒孟獲之地○瓦屋山在縣東北二十里形如瓦屋上有念佛烏娑羅花其巖朝現辟支午現普賢夜有神燈或問禪惠大師瓦屋何故却以木皮蓋師曰錦府豈從機上織劍門寧自匣中開李燾詩瓦屋如廡平金仙闢光景○縣西北三十里紫眼關以紫眼番人僑寓得名即甕溪關○邛崃關在縣西南七十里隋大業十年置約山據險當雲南大路以扼番夷之要害碑目云邛崃關開路記天寶六年章仇兼瓊撰

○又云漢蜀郡太守治道記碑建武中元二年立
尊健閣碑建武中元二年物俱在縣西三十里景
峪懸崖間巽崑李燾有跋以辨正年譜且引後漢
紀建武二十三年夏四月改爲中元無建武字又
按祭祀志改建武二十三年爲建武中元元年以
此知記與志合而紀失之矣○神水閣記在榮經
縣東三十里銅山峽中碑久磨滅今不可攷古老
相傳其體大率如尊健閣云

蘆山縣

在州城西
北一百里

亦嚴道縣地晉書地理志姜維于此置城隋仁壽

元年重開此地遂于姜維古城置蘆山縣以界內
盧奴山爲名按紹興二十三年徐閔中記土人祀
姜伯約有廟額曰平襄○志云治有開明王城故
址華陽國志蜀王開明以靈關爲前門寰宇云靈
關山在縣北二十里峯嶺峩峩傍夾大路下有山
峽口闊三丈長二百步俗呼爲重關通蠻貊之鄉
八白狼夷界漢書通靈山有眼孔四一名鏤靈山
文選注靈關山名在成都西南漢壽縣界陳陰鏗
蜀道難云王尊奉漢朝靈關不憚遙高岷長有雪
陰棧屢經燒輪摧九折路騎阻七星橋蜀道難如

此功名詎可要隋孔德紹送蔡君知入蜀云靈關
九折險蜀道二星遙乘槎若有便希泛廣陵潮按
張揖注史記曰漢鑿開靈山道于此置靈道縣矣
○寰宇記云盧奴山在縣東五里與始陽山相接
始陽山在縣東七里本名蒙山唐天寶六年敕改
爲始陽山高八里束道控川歷巖道縣橫亘八邛
州火井縣界又云大渡水從生羗界來流入浮圖
水浮圖水在縣五里從生羗界來水中有孤崖狀
如浮圖出貢金○縣南十里三江渡通天全六番
下注多功峽入雅之平羗江多功河上飛仙閣爲

木棧道卽古漏閣也○龍頭山在縣前後峽綿亘
四十里天矯如龍控接番部實爲要害又云崖鉢
山在縣西三百里上聳雲漢莫測其高○志云漢
樊敏墓在縣南七里前有二石馬隸碑在石馬東
碑目云漢故簡校巴郡太守樊府君碑建安十年
三月上旬造又云兩面碑在盧山縣南五里與府
君碑甚近碑面與背皆有篆文歲久訛闕不可識
或辨其文曰盧山縣碑○宋趙明誠金石錄云右
漢巴郡太守樊君碑其文云君諱敏字叔達肇祖
處戲遺苗后稷爲堯種樹舍漆從岐天顧亶甫乃


萌昌發周室衰微雲伯匡弼晉爲韓魏魯分爲揚
克曜封邑厥土河東肆漢之際或居于楚或集于
梁君纘其緒華南西壘又云總角好學治穀氏經
貫究道度無文不睹于是國君備禮招請濯冕題
冠傑立忠謇有夷史之直卓密之風鄉黨見歸察
孝除郎永昌長史遷宕渠令大將軍辟光中之末
京師擾攘雄狐綏綏冠履同囊封挾長驅卑走枕
北國復重察辭病不就再奉朝聘七辟外臺常爲
治中諸部從事又云李世不祥米巫姍虐姦狡並
起陷附者衆君執一心賴無滂耻復辟司徒道辭

不往牧伯劉公表授巴郡以助義都尉養疾閭里
又辟奮義校尉年八十有四歲在叶洽紀驗期臻
奄忽藏形其後有銘題建安十年二月上旬造他
漢碑類多刳缺而此碑首尾完存故載其大畧于
此所謂米巫凶虐者謂張角也宋成都丘常跋云
此碑相傳名魏受禪碑爲世絕出而此款乃建安
十年又在黃初之前雖暴露中墊而字畫醇古文
尚可讀豈非所寓僻遠而人無知者歟然而千餘
年間霖雨之所濯盛陽之所暴有獸已倒存門已
摧而此碑將什是可憫也余因扶其旣倒植其將

四川各縣志卷之二十五 荆
什又爲屋以庇之庶幾永其傳也崇寧壬午知縣
丘常題□宋程勤跋云皇上勵精更化以揚祖宗
之大烈屬當京師父老流涕太息思欲復見漢官
威儀之時而僕仕于廬山天下最窮處乃得建安
十年巴郡太守樊君故碑于荒山榛莽間亟作大
屋覆其上表而出之目其顏曰巴郡太守樊侯之
墓嗚呼碑陰所記崇寧壬午距今五十八年而遙
任斯邑者皆吾鄉人扶倒植仆偶相似然豈物之
廢興固有數耶紹興己卯眉山程勤懋傳書□國
朝李一本跋云此碑踞于道周迨今幾千有餘歲

矣在宋以前訛爲魏受禪碑大明一統志謂其字
文漫滅不可攷以故惑于聞見者不爲注目余捧
檄竊祿于茲屢經過焉見其荒于荆榛蝕于莓苔
亦謂信然越弘治己未仲冬因偕門生白應清駱
琰陳宣宋萬全等訪古偶憇其下因束篠爲帚掃
拂之倏見字畫隱隱而出皆醇古迥異從者進曰
此商彝周鼎復出也殆竒遇乎亟爲磨洗尋具楮
蜡如法摹搨得墨本有三蓋以防字畫之同異者
而考正之然其模糊不可讀者亦過半矣旣而歸
置軒次校以隸本參以衆目就其可識者僅得十

之尤其疑誤者則倂為點注以俟博古者正焉載
攷古文苑所紀樊毅樊安等碑亦靈獻中所作其
屬辭比事與此文勢相似或者當時史遷之徒為
之也夫文選所集皆秦漢以來古文而此碑獨不
見錄古文苑又補文選而作又不見載毋亦此地
僻在遐荒而人不知歟抑惑于聞見之似而不及
錄歟吁是碑雖不見錄于古幸而石不泐壞延有
今日得以附入邑志以永其傳亦奇矣匪徒為斯
邑之光實斯文之幸也然則世之為志者苟徒據
耳之所托而不博歷以致審焉則雖有石鼓之文
其不至于湮沒無聞者幾希矣是月十一日長至
蜀忠南李一本識廬山廣文也



四川裕勝志

卷之二十一

微在還流而人不知歟抑息于聞見之似而不反
 錄歟抑是碑雖不見錄于古幸而石不泐壞延有
 今日得以附入邑志以永其傳亦奇矣往從為如
 履忠南李一本端山黃文忠
 其不至于毀歟無問音幾希矣吳八月十一日尋

